



Selasa, 23 Juli 2024

Ogen : Lukas 10:41



**Melala Atendu Ibahannu**



**T**uhu, melala kal si ateta silakoken i bas kegeluhen enda. Melala sura-sura si ateta si sehken si mehulina. Tapi megati sura-suranta e lanai terdalanken piah pandangan si akap kalak sideban si la ka seri sura-suranta.

Marta, mehuli kal sura-surana, tupung ngalo-ngalo Jesus reh ku rumahna. Melala kal atena siilakokenna, sibuk ngelitken pangan si man elanken man Jesus. I bas kesibukenna e, lanai teralolona Jesus sabap lenga dung si man dahinken. Ukurna mehuli e enggo ieteh Jesus. Saja, kesibukenna ndai erbahansa lanai lit waktuna kundul kentsik pe lako ercakup-cakap ras Jesus. Perbahana latih akapna nikapken si mehulina, turah nembeh ate ngidah seninana Maria kundul megiken ajaren Jesus. Adi enggo nembeh ate ise pe tempa la jadi teman. Tuhan Jesus pe enggo jadi pandangan sabap ipeturutna Maria kundul saja rembak ras Ia.

Payo, adi latih si akap mesunah merawa ngidah teman si la muat bagin nampati. Sura-sura ras pendahin si mehuli e banci lasam. Perlu kal erlajar makeken tep-tep kesempatan. Lit paksana sibuk erdahin, sibuk nikapken simehuli. Umpamana, jadi pengurus moria sibuk nge kita ngaturken dahin ras pelayanen. Jadi panitia pe sibuk nge kita ndahiken dahin gelah sikap. Sibuk nge kita ndahiken dahin perpulungen. Melala ateta sibahan si mehuli, saja lit min perioritasta. I tengah-tengah kesibuken e tetap lit waktu ercakup-cakap ras Tuhan. Banci saja i tengah-tengah kesibukennta e lanai lit waktunta ercakup-cakap secara pribadi ras Tuhan. Si akap kesibukennta ndai kerina enggo banci, janah ninta, 'sikudahiken e pe dahin Tuhan nge.' Tuhan e pe angkaNa nge ninta mbela dirinta.